

馬石芋寓

氏田野圃

日雜纂雜

抄記聞記



馬氏日抄

馬愈編

編主五雲王

編初成集書叢

種三他其及抄日氏馬

中華民國二十五年十二月初版

發行人

王

上海河南路
雲南
五

印刷所

商

上海河南路
務印書館

發行所

商

上海及各埠
務印書館

本館據學海類編
本影印初編各叢
書僅有此本

馬氏日抄

吳郡 馬愈 抑之編

李廷珪墨

予一日至英國府中見勲衛畱馮損之作字出建安瓦
研御府長毫雉花筆一紫囊裏李廷珪墨墨圓餅蟠劍
脊雙龍金泥已模糊矣墨色渾渾不精亮下趾磨去十
之三矣余諦視久之曰此墨若真亦大有年矣廷珪乃
唐僖宗時人僖宗至唐末三十六年經五代五十七年
歷宋三百十七年歷元九十三年至我朝又八十餘年

廷珪之墨不識猶有存乎否焉損之笑曰縱使不然亦必佳品所謂試可乃已遂令人磨之其堅如石瓦爲墨所畫余止之曰此眞廷珪墨也予聞前輩云廷珪每料用眞珠三兩擣十萬杵故經世久而剛硬用之有法若用一分先以水依分數漬一宿然後磨研乃不傷研此墨剛而畫研殆必眞者勲衛曰此先祖受賜於內廷之物耳

擒虎

天順己卯有虎至城東北外角 英廟命殺虎手三百

人往擒之毋得傷虎殺虎手所執兵剛又托叉相半剛
叉三出尖刃托叉歧出無刃至則圍虎而孫明者父子
皆往明爲虎攖坐身下眾以剛叉逗其口使不傷人而
明之子後曳虎尾尾掉人隨以掉虎遂被擒昇入大內
殺虎手皆執叉以待上於後苑山子上觀之命送虎圈
賞殺虎人手鈔若干錠比頒賞托叉者與之而三刃者
不賞

門字脚

門字兩戶相向本無勾踢宋都臨安玉牒殿災延及殿

門宰臣以門字有句脚帶火筆故招火厄遂撤額投火
中乃息後書門額者多不句脚我朝南京城門額皆詹
孟舉所書北京大明門額皆朱孔易所書門字俱無鉤
脚

搏肉狼

正統丁卯歲太監王振第前以鐵絙繫一狼形如獬犬
而喙尖馴不咋人以餒絙卽曳脫走道逢屠擔搏肉疾
走人莫敢追所過處羣犬皆避一日嚙振名馬振怒命
銅錘碎其首蓋狼爲野獸貪戾物也使之奔走於京城

是爲毛蟲之孽梁邵陵王綸將兵援臺城有蟄熊齧所
乘馬綸尋爲王僧辯敗走亡至南陽爲西魏所殺今狼
齧振馬與倫同占振弗悟

奇盜

京師明時坊朱段子家一夕有偷兒自天牕中下檢其
細輒仍從屋上逸去門戶扃鑰如故坐城校尉俗所謂
皮條者日來看視略無形迹朝陽門外東嶽廟廟門南
一碑相對高二丈餘文字乃趙孟頫所書有一白衣少
年著皂靴在碑下與羣小戲劇自以兩手板碑躡靴緣

左而上跨碑題坐少頃循右而下二三皮條在旁私謂
曰此何人有此伎能心卽疑之遂覘其行止日已晡少
年入酒家飲至暮入廟去一皮條尾之至殿西廡忽失
所在出與眾議入廟蹤跡之一無所見夜已昏暗眾出
廟門坐石滾上疑未決望見西松林下白衣者出遂散
伏地所覘之果少年也尾至廟後一娼家宿焉明旦執
之詰以朱段子家事一一承服云自某處上屋至本家
天窓縋下後開室門上屋復至某處下地故不經由本
家門戶問其所盜之物云在廟中大殿內天花板上眾

從之至殿廡角門於腰閒取一鑰啓門入殿內登神牀
躡象膝登肩蹋冕頂上直立托開天花板兀上藻井平
昔凡盜之物咸在送之官論之如法蓋此盜身輕力健
捷高牆大屋騰身直上飛檐走瓦音響不聞故所盜泯
其形迹使勿自逞其技緣碑上下人亦詎能縱跡之哉
亦奇盜也

井氣

正統己巳春崇文門外打磨廠西軍人王勝家井中有
五色氣起予弗之信一日早往觀之曰高三丈餘隔井

向日視之果有青紅綠氣勃勃上騰觀者不絕日至已位卽無明旦復有本家不汲水將廿餘日乃減按五行傳此水異也陰盛之貌時王振擅權將有土木之禍水爲異以示象也

觴餽怪

御用監奉御來定五月閒差往南海子公幹從五六騎出城昇肴酒爲路食日午至羊房南大柳樹下脫衣卸鞦坐樹根上以椰瓢盛酒擣蒜汁濡肉自啖回顧一觴餽在傍來夾肉濡蒜戲納觴餽口中問之曰粹否觴餽

卽應之曰輶終日之頃呼輶不已來驚悸令人去其肉
呼亦不止遂啓行至海子畢事而回呼輶之聲隨其往
還入城始絕來至家得疾數日而歿蓋來之將亡陽氣
虧矣故陰氣得以干之况冥穢之物不宜相戲戲則我
心有不得其正矣心不正邪必乘之觀此則可以爲戒
矣

胡宗伯

大宗伯胡公源潔與先君子莫逆余少時常得侍左右
見公朝回至部解所衣大紅服令兩隸按肩領對舉其

袖公自摺之吏舁餐至肉食必二器公唯啖其一未嘗兼味公舉大位爵祿豐厚其自奉如此豈鄙吝邪不欲過享其福耳來往參謁必待一茶自微啜少許漱齒而已蓋茶性寒注下故不宜多飲雖盛怒未嘗疾聲厲色精膳吏盜表函杖之退公閱書而已皆是可以爲人法也

塞井

大明門外東西有石獅子二高丈餘南有二井汲者甚眾正統己巳北寇臨城四方之人多進言國事或以爲

門止大字連二井成哭字去井連二公亦成笑字獅公
音不遠宜去獅塞井則無咎內臣當軸者夜閒令人昇
去獅子急運土填井詰旦皆平京師人不識其故遂譌
言獅子走入井中兩井皆塞聞其說者爭相走視果不
見獅子而井爲平地人心益加驚疑後有人又言井不
當塞復開汲如故

四指揮松

西苑門虎城內有元時四松樹高四五丈老髯蒼蒼蚪
枝垂地世所謂鐵牙松也我朝封之爲四指揮松其

俸米作飯以濟孤貧命二閭領其事惜薪司供柴爨東
在幡竿寺西在蠟燭寺日煮石粟京師貧丐者就食者
也

十八藝

己巳歲兆寇作難官司招募勇敢山西李通行教京師
無人可與爲敵遂應募爲第一較其試藝十八事皆能
一弓二弩三鎗四刀五劍六矛七盾八斧九鉞十戟十
一鞭十二簡十三槌十四叉十五叉十六杷頭十七錦
繩套索十八白打

異騾

京師梓童廟在元武門東人常以白騾施廟中道士控羣騾日行巷陌閒以芻豆爲由緣化錢物一大騾特異不受羈紲則臥弗起常縱逸之往來城市數日一還廟道士恐爲人所損傷於其項下懸一木牌標曰神騾日常少食芻粟喜啖茶葉沿門駐立乞茶磨之弗去以少茶餉之卽行日以爲常一刼盜禱借于神欲乘至德州以茶弭之至河西務加以銜勒堅臥不肯行遂捨之而還經十餘年不知所在